

Glavni zamjenik Visokog predstavnika Donald Hays poziva na izradu Akcionog plana zapošljavanja i ulaganja

Glavni zamjenik Visokog predstavnika, Donald Hays, u ponedjeljak je pozvao udruženja i dužnosnike iz vlasti da surađuju na donošenju konkretnog, javnog plana mjera za potporu poduzetnicima, otvaranje radnih mjesta i unapređenje ulaganja.

Obraćajući se novinarima nakon foruma na kojem su predstavnici lokalnih privrednih udruženja o barijerama sa kojima se suočavaju razgovarali s dužnosnicima iz vlasti sa svih razina u BiH, uključujući i ministricu za ekonomske odnose i vanjsku trgovinu, Azru Hadžiahmetović, ministra trgovine Federacije Andrija Jurkevića, generalnog direktora Federalne agencije za promoviranje investicija Mirzu Hajrića, te županijske i općinske zvaničnike, ambasador Hays je rekao:

“U Bosni i Hercegovini ima dosta potencijala za rast; ona je bogata i ljudskim i prirodnim resursima. Problem leži u tome da vlada ne djeluje kao pravi partner, koji bi oslobodio taj potencijal.”

Ambasador Hays je rekao da dok političari i dalje drže ključ za stvaranje jedinstvenog ekonomskog prostora, biznismeni već rade na teritoriju cijele BiH. “Sve što oni žele je da se političari otarase apsurdnih barijera, kontradiktornih poreznih sustava, i korumpirane birokratske prakse, koji sprečavaju poduzeća u oba entiteta da ostvare svoj puni potencijal.”

On je apelirao na uvođenje brzih i djelotvornijih procedura za registraciju firmi, bankarske reforme koja bi omogućila pristup kreditima, te neodložno donošenje zakona o zemljišnim knjigama, a koji se trenutno nalaze pred entitetskim parlamentima. "Zadaća vlasti mora biti da se razračuna s korupcijom koja sprečava razvoj poštenog biznisa. Potrebno je dovesti do promjene mentaliteta, da bi vlada počela raditi tako da omogućava i pruža usluge svojim građanima."

Ambasador Hays je pozvao poslovna udruženja da se organiziraju kako bi postala jak sugovornik vlasti, i na taj način osigurala da se i njihov glas čuje.